

Búnaðargjald vegna búvöru- framleiðslu á árinu 2002

Með lögum nr. 59/2002 voru gerðar eftirtaldar tvær breytingar á lögum um búnaðargjald nr. 84/1997, sem koma til framkvæmda við álagningu búnaðargjalds á árinu 2003 vegna búvöruframleiðslu á árinu 2002.

Sundurliðun eftir búnaðarsamböndum

Lögfest var skylda búvöruframleiðenda til að sundurliða gjaldstofn sinn eftir því hvar búvöruframleiðsla fór fram. Markmiðið með sundurliðuninni er að sá hluti búnaðargjalds, sem rennur til búnaðarsambanda, komi í hlut þess búnaðarsambands er starfar þar sem búvöruframleiðslan fór fram. Aðstæður búvöruframleiðanda eru í sumum tilvikum þær að búvöruframleiðsla hans fer fram á félagssvæði annars búnaðarsambands en þess er starfar þar sem hann á lögheimili og eins geta framleiðendur haft búrekstur með höndum á tveimur eða fleiri búnaðarsambandssvæðum. Nánari upplýsingar um sundurliðun er að finna á framtali vegna búnaðargjalds 2003, RSK 1.09.

Frádráttarréttur

Lögfestur var frádráttarréttur við ákvörðun búnaðargjaldstofns. Annars vegar vegna vinnslu og/eða heilðsölu dreifingar búvara og hins vegar vegna kaupa á búpeningi til búvöruframleiðslu. Frádráttarrétturinn miðar að því að mismunandi fyrirkomulag við vinnslu og dreifingu búvara og ræktun búpenings hafi ekki afgerandi áhrif á gjaldstofn búnaðargjalds. Með lagabreytingunni var ríkisskattstjóra falið að setja reglur um frádrátt þennan. Reglurnar hefur ríkisskattstjóri birt í auglýsingu sinni nr. 6/2003, sem fer hér á eftir.

Auglýsing ríkisskattstjóra nr. 6/2003 um gjaldstofn búnaðargjalds vegna rekstrarársins 2002.

Eftirfarandi reglur skulu gilda um ákvörðun búnaðargjaldsstofns á árinu 2003 vegna búvöruframleiðslu á árinu 2002. Reglurnar byggjast á ákvæðum 1. til 3. gr. laga nr. 84/1997, um búnaðargjald, og eru settar samkvæmt heimild í 2. gr. laganna, sbr. 2. gr. laga nr. 59/2002, um breytingu á lögum nr. 84/1997.

Gjaldskyldir eru búvöruframleiðendur sem stunda landbúnað, skógrækt eða skógarhögg, þ.e. starfsemi sem fellur undir atvinnugreinar í deildum 01 og 02 í atvinnugreinaflokkun Hagstofu Íslands (ÍSAT 95), aðra en atvinnugreinar í flokkum 01.4 (þjónusta við jarðyrkju og búfjárrækt), 01.5 (dýraveiðar og tengd þjónusta) og 02.02 (þjónusta við skógrækt og skógarhögg).

Búvöruframleiðendur skulu greiða sérstakt gjald, búnaðargjald, af veltu búvöru og tengdrar þjónustu. Til gjaldstofns telst virðisaukaskattsskyld velta og velta undanþegin virðisaukaskatti, svo sem sala úr landi og samningsbundnar greiðslur úr ríkissjóði (beingreiðslur) vegna mjólkur- eða sauðfjárframleiðslu. Til gjaldstofns telst ekki andvirði seldra varanlegra rekstrarfjármuna.

Frá gjaldstofni ákvörðuðum með framangreindum hætti heimilast frádráttur, annars vegar vegna vinnslu búvara og/eða sölu þeirra og hins vegar vegna kaupa á lífdýrum til áframeldis. Frádráttur ákvarðast sem hér segir:

1. Frádráttur vegna vinnslu og sölu búvara

1.1. Vegna vinnslu búvara.

Að því leyti sem verð unninnar búvöru myndar gjaldstofn, sbr. framanritað, er búvöruframleiðanda heimilt að draga frá þannig reiknuðum gjaldstofni þóknun þá er hann greiðir vinnslufyrirtæki fyrir vinnsluna. Virðisaukaskattur af þóknuninni telst ekki til frádráttar, enda myndar hann innskatt í virðisaukaskattsuppgjöri búvöruframleiðandans.

Annist loðdýraræktandi sjálfur verkun loðskinna sinna má hann vegna verkunarinnar draga frá söluverði unninna skinna, er myndar gjaldstofn sbr. framanritað, fjárhæð er nemur:

185 kr. fyrir hvert verkað minkaskinn,
550 kr. fyrir hvert verkað refaskinn.

1.2. Vegna sölu búvara.

Að því leyti sem heildsöluverð búvöru myndar gjaldstofn, sbr. framanritað, er búvöruframleiðanda heimilt að draga frá þannig reiknuðum gjaldstofni þóknun þá er hann greiðir heildsölufyrirtæki fyrir heildsöludreifingu. Virðisaukaskattur af þóknuninni telst ekki til frádráttar, enda myndar hann innskatt í virðisaukaskattsuppgjöri búvöruframleiðandans.

Annist búvöruframleiðandi sjálfur heildsöludreifingu afurða sinna má hann vegna dreifingarinnar draga frá heildsöluverði, er myndar gjaldstofn sbr. framanritað, fjárhæð er nemur:

15% heildsöluverðs eggja,
15% heildsöluverðs grænmetis og ávaxta,
15% heildsöluverðs blóma,
15% heildsöluverðs garðplantna,
15% heildsöluverðs skógarplantna.

Annist framleiðandi alifugla sjálfur slátrun fugla sinna og heildsöludreifingu kjötsins má hann vegna slátrunarinnar og heildsöludreifingarinnar draga frá heildsöluverði, er myndar gjaldstofn sbr. framanritað, fjárhæð er nemur:

25% heildsöluverðs alifuglakjöts.

2. Frádráttur vegna kaupa á lífdýrum

Búvöruframleiðandi sem kaupir lífdýr til áframeldis í búnaðargjaldsskyldri starfsemi sinni má draga kaupverð lífdýranna frá gjaldstofni sínum. Virðisaukaskattur af kaupverðinu telst ekki til frádráttar, enda myndar hann innskatt í virðisaukaskattsuppgjöri fyrirtækisins.

Reglur þessar taka þegar gildi og koma til framkvæmda við álagningu búnaðargjalds á árinu 2003 vegna búvöruframleiðslu á árinu 2002.

Nánari upplýsingar veita ríkisskattstjóri í síma 563-1100 og skattstjórar um land allt.

RÍKISSKATTSTJÓRI